



Broj: 02-50-1-16-10/07

Sarajevo: 4.12.2007. godine

ZAPISNIK

**10. sjednice Doma naroda
Parlamentarne skupštine Bosne i Hercegovine,
održane 4. decembra 2007.godine**

Sjednica je počela u 10 sati.

Sjednicom je predsjedavao Sulejman Tihić, predsjedavajući Doma naroda Parlamentarne skupštine BiH.

Sjednici je prisustvovalo 12 delegata.

Delegati: Mladen Ivanić, Ivo Miro Jović i Alma Čolo opravdali su izostanak.

Osim delegata, na sjednici Doma naroda bili su predstavnici međunarodnih organizacija i sredstava javnog informiranja.

Nakon rasprave u kojoj je učestvovala Dušanka Majkić, jednoglasno je usvojen je sljedeći dopunjeni

DNEVNI RED

1. Odgovori na delegatska pitanja i delegatska pitanja;
2. Usvajanje Zapisnika 9. sjednice Doma naroda;
3. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona Bosne i Hercegovine o izvršenju krivičnih sankcija, pritvora i drugih mjera, po hitnom postupku, u skladu s članom 122. Poslovnika Doma naroda; (zakon visokog predstavnika)
4. Prijedlog zakona o izmjenama i dopunama Zakona o javnim nabavkama BiH – prvo čitanje, predlagač: Vijeće ministara BiH;
5. Prijedlog zakona o poljoprivredi, ishrani i ruralnom razvoju – prvo čitanje, predlagač: Vijeće ministara BiH;
6. Prijedlog zakona o internoj reviziji u institucijama BiH – prvo čitanje, predlagač: Vijeće ministara BiH;
7. Prijedlog zaključaka Zajedničkog kolegija oba doma Parlamentarne skupštine BiH povodom rasprave na 7. zajedničkoj sjednici oba doma;
8. Imenovanje Mensura Šehagića za člana Komisije za koncesije BiH;
9. Izbor tri delegata Doma naroda u Ad hoc komisiju za izbor Ombudsmena za ljudska prava BiH.

Ad.1. Odgovori na delegatska pitanja i delegatska pitanja

Odgovor na delegatsko pitanje, postavljeno na 7.sjednici Doma naroda, dobila je Dušanka Majkić.

Delegat Dušanka Majkić izjasnila se da nije zadovoljna odgovorom.

Delegat Dušanka Majkić postavila je sljedeće pitanje Vijeću ministara BiH:

„Šta je do sada urađeno sa pronalaženjem adekvatnog rješenja pravnog statusa JPNIO „Službeni list“ BiH, Sarajevo?“

Delegat Zoran Koprivica postavio je sljedeće pitanje Kolegiju Doma naroda:

„Kada će se na dnevnom redu sjednice Doma naroda naći Predlog odluke o formiranju Savjeta nacionalnih manjina pri Parlamentarnoj skupštini BiH i Kodeks ponašanja poslanika i delegata u Parlamentarnoj skupštini BiH?“

Delegat Hilmo Neimarlija postavio je sljedeće pitanje Vijeću ministara BiH, Vladi Republike Srpske i visokom predstavniku za BiH i specijalnom predstavniku EU:

„U Banjoj Luci je 21. novembra 2007. otvoren novi administrativni centar Vlade Republike Srpske. Tom prilikom obavljen je pravoslavni čin osvještenja novog sjedišta Vlade Republike Srpske. Obred osvještenja izvršio je vladika zvrničko-tuzlanski Vasilij, uz sasluženje sveštenika Banjalučke eparhije.

Osvještenje administrativnog centra Vlade Republike Srpske u obredu, čiju izvornu religijsku vrijednost i duhovnu značajnost ne dovodim u pitanje, eklatantan je čin antidejtonskog kršenja Ustava Bosne i Hercegovine, koji jamči ravnopravnost naroda i građana i zabranjuje diskriminaciju na osnovu vjerske pripadnosti i mišljenja, i također eklatantan slučaj kršenja Zakona o slobodi vjere i pravnom položaju crkava i vjerskih zajednica u Bosni i Hercegovini, po kojem su crkve i vjerske zajednice odvojene od države i po kojem su sve crkve i vjerske zajednice u Bosni i Hercegovini izjednačene u pravima i obavezama. U Zakonu se odvojenost crkvi i vjerskih zajednica od države pobliže određuje u pravnom redu tako da država ne može priznati status državne vjere nijednoj vjeri niti status državne crkve ili vjerske zajednice ni jednoj crkvi ili vjerskoj zajednici, a diskriminacija zasnovana na vjeri ili uvjerenju definira se kao isključivanje, ograničavanje, davanje prednosti, izostavljanje ili svako drugo razlikovanje koje ima cilj ili se njime može postići ukidanje ili umanjivanje priznanja, jednakog uživanja i ostvarivanja ljudskih prava i osnovnih sloboda u građanskim, političkim, ekonomskim, socijalnim i kulturnim stvarima.

Administrativni centar Vlade Republike Srpske je pravoslavnim vjerskim činom osvještenja dobio vjersko, konfesionalno obilježje i istodobno izgubio izvorno svjetovno, civilno određenje. Konfesionalnim obilježavanjem novog sjedišta Vlade Republike Srpske građani Republike Srpske su kao pripadnici političke zajednice u kojoj Vlada Republike Srpske vrši vlast podijeljeni po vjerskom osnovu. Muslimanima, katolicima, jevrejima, pripadnicima maloljudnih crkava i vjerskih zajednica, ateistima, agnosticima i religijski indiferentnim osobama time je upućena poruka da se u sjedištu Vlade i pred Vladom Republike Srpske trebaju osjećati građanima drugog reda.

Ko je odgovoran za donošenje antidejtonske odluke o davanju vjerskog obilježja administrativnom centru i Vladi Republike Srpske i što će visoki predstavnik, Vijeće ministara BiH i Vlada Republike Srpske učiniti na otklanjanju negativnih posljedica tog čina, napose među bošnjačkim i hrvatskim povratnicima u Republiku Srpsku?“

Delegat Adem Ibrahimpašić postavio je sljedeće pitanje Vijeću ministara BiH:

– „Zašto je za ovu zemlju, odnosno njenu privredu, dobro da ima Zakon o akcizama po kojem se:

- domaćim pržionicama kafe naplaćuje akciza dva puta i to prilikom uvoza na sirovu kafu i nakon prženja na prženu kafu, za razliku od uvoznika pržene kafe koji plaćaju akcize samo na prženu kafu prilikom uvoza,
- akciza na uvezeni etanol naplaćuje kao da se radi o uvozu žestokih alkoholnih pića i onda kada ga domaće firme uvoze kao repromaterijal,
- akciza prilikom uvoza duhanskih prerađevina u našu zemlju obračunava u istoj visini kojom se akciza obračunava i na domaće duhanske prerađevine, dok se po hrvatskom zakonu o akcizama na naše cigarete koje se izvoze u Hrvatsku akciza obračunava i do pet puta većem iznosu nego na hrvatske cigarete u Hrvatskoj“.

Delegat Hazim Rančić je, prije postavljanja novog pitanja, izrazio nezadovoljstvo nedobivanjem odgovora na delegatsko pitanje koje je postavio još na 5. sjednici Doma naroda, održanoj 22.5.2007., te je ponovio pitanje:

„Šta će Vijeće ministara BiH uraditi da se u 2008. godini troškovi zakupa smanje i to na način da se državne institucije smjeste u zgrade koje su u državnom vlasništvu ili izgradnjom novih zgrada putem kapitalnog ulaganja?“

Novo pitanje upućeno je Vijeću ministara BiH:

„Na granicama Bosne i Hercegovine sa susjedima postoji mnogo mjesta pogodnih za ilegalne prelaske ljudi i krijumčarenje i šverc robe. Šta Ministarstvo sigurnosti BiH preduzima da se zapriječe mjesta za ilegalne prelaske i šverc, te da li ima podatke o visini šteta koje su nastale kao posljedica ilegalnih prelazaka i šverca?“

Ad.2. Usvajanje Zapisnika 9. sjednice Doma naroda

Rasprava o ovoj tački dnevnog reda nije vođena.

Dom naroda jednoglasno je usvojio Zapisnik 9. sjednice Doma naroda.

Ad. 3. Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona Bosne i Hercegovine o izvršenju krivičnih sankcija, pritvora i drugih mjera, po hitnom postupku, u skladu s članom 122. Poslovnika Doma naroda (zakon visokog predstavnika)

Rasprava o ovoj tački dnevnog reda nije vođena.

Dom naroda je sa 11 glasova za i 1 glasom protiv, usvojio Zahtjev Vijeća ministara BiH za razmatranje Prijedloga zakona o usvajanju Zakona o izmjenama i dopunama Zakona Bosne i Hercegovine o izvršenju krivičnih sankcija, pritvora i drugih mjera po hitnom postupku, u skladu s članom 122. Poslovnika Doma naroda, nakon čega je sa 11 glasova za i 1 glasom protiv, Zakon usvojen.

Ad. 4. Prijedlog zakona o izmjenama i dopunama Zakona o javnim nabavkama BiH - prvo čitanje, predlagač: Vijeće ministara BiH

U raspravi o ovoj tački dnevnog reda učestvovali su: Dušanka Majkić, Hazim Rančić, Božo Rajić, Slobodan Šaraba, Adem Ibrahimpašić i predstavnik predlagača Đenita Fočo.

S obzirom da Dom naroda, prilikom glasanja o Prijedlogu zakona o izmjenama i dopunama Zakona o javnim nabavkama BiH, nije imao entitetsku većinu, slijedi postupak usaglašavanja Kolegija Doma naroda.

Ad. 5. Prijedlog zakona o poljoprivredi, ishrani i ruralnom razvoju - prvo čitanje, predlagač: Vijeće ministara BiH

U raspravi o ovoj tački dnevnog reda učestvovali su: Dušanka Majkić, Slobodan Šaraba, Božo Rajić, Adem Ibrahimpašić, Branko Zrno i Hilmo Neimarlija.

Dom naroda sa 1 glasom za i 11 glasova protiv, nije usvojio Mišljenje Ustavnopravne komisije iz kojeg proizilazi da Komisija nije utvrdila usklađenost sa Ustavom BiH i pravnim sistemom, odnosno da nije prihvatila principe predloženog zakona.

Dom naroda traži od Komisije izradu novog mišljenja na Prijedlog zakona o poljoprivredi, ishrani i ruralnom razvoju.

Ad. 6. Prijedlog zakona o internoj reviziji u institucijama Bosne i Hercegovine – prvo čitanje, predlagač: Vijeće ministara BiH

Rasprava o ovoj tački dnevnog reda nije vođena.

Dom naroda jednoglasno je usvojio u prvom čitanju Prijedlog zakona o internoj reviziji u institucijama Bosne i Hercegovine.

Ad. 7. Prijedlog zaključaka Zajedničkog kolegija oba doma Parlamentarne skupštine BiH povodom rasprave na 7. zajedničkoj sjednici oba doma

Rasprava o ovoj tački dnevnog reda nije vođena.

Dom naroda jednoglasno je usvojio zaključke Zajedničkog kolegija oba doma Parlamentarne skupštine BiH povodom rasprave na 7. zajedničkoj sjednici oba doma Parlamentarne skupštine BiH koji glase:

1. Parlamentarna skupština BiH primila je k znanju razloge i povode podnošenja ostavke predsjedavajućeg Vijeća ministara BiH dr. Nikole Špirića, te činjenicu da je Predsjedništvo BiH ostavku prihvatilo.
2. Parlamentarna skupština BiH poziva Predsjedništvo BiH da maksimalno ubrza konsultacije o sastavu Vijeća ministara BiH, te o rezultatima hitno obavijesti Parlamentarnu skupštinu BiH.
3. Zadužuju se kolegiji oba doma da naprave usaglašene prijedloge poslovnika svojih domova i predlože ih na usvajanje domovima najdalje do kraja ovog mjeseca.
4. Apelira se na lidere parlamentarnih stranaka da ulože najveće napore kako bi dogovor iz Mostara pretočili u odgovarajući dokument najkasnije do kraja ove godine, a koji bi zadovoljio zahtjeve Evropske komisije i doveo do parafiranja Sporazuma o stabilizaciji i pridruživanju Bosne i Hercegovine s Evropskom unijom.

Ad. 8. Imenovanje Mensura Šehagića za člana Komisije za koncesije BiH

U raspravi o ovoj tački dnevnog reda učestvovala je Dušanka Majkić. Dom naroda je sa 11 glasova za i 1 uzdržanim glasom, imenovao Mensura Šehagića za člana Komisije za koncesije BiH, sa sljedećim zaključkom:

1. Nalaže se Komisiji za koncesije BiH da pokrene proceduru za penzionisanje imenovanih članova Komisije koji su stekli uslove za penziju.
2. Traži se od Komisije za koncesije BiH da predloži izmjene Zakona o koncesijama kojima će se regulirati krajnji rok za okončanje, za nastavak rada i poslije sticanja uslova za penziju.

Ad. 9. Izbor tri delegata Doma naroda u Ad hoc komisiju za izbor Ombudsmena za ljudska prava BiH

Rasprava o ovoj tački dnevnog reda nije vođena. Dom naroda je sa 11 glasova za i 1 uzdržanim glasom, imenovao Dušanku Majkić, Hazima Rančića i Branka Zrnu u Ad hoc komisiju za izbor Ombudsmena za ljudska prava BiH.

Sjednica je završila sa radom u 11,25 sati.

Sastavni dio ovog zapisnika je neautorizirani transkript 10. sjednice Doma naroda.

SEKRETAR
DOMA NARODA
Marin Vukoja,s.r.

PREDSJEDAVAJUĆI
DOMA NARODA
Sulejman Tihić, dipl.iur, s.r.